

Qaasuitsup Kommuniiani imigassanik aalakoornartortalinnik nioqquteqartarneq sassallertarnerlu pillugit Namminersorlutik Oqartussat nalunaarutaat

Imigassanik aalakoornartortalinnik nioqquteqartarneq sassallertarnerlu pillugit Inatsisartut inatsisaanni nr. 11-mi, 11. november 2000-meersumi, Inatsisartut inatsisaata allanngortinneratigut Inatsisartut inatsisaatigut nr. 3-kkut, 31. maj 2001-imeersukkut allanngortinneqartumi, § 26, imm. 1, nr. 2, aamma § 27, imm. 3, malillugit aalajangersarneqarput:

Atuuffi

§ 1. Nalunaarut Qaanaamut aamma nunaqarfinnut Qeqertanut, Savissivimut, Siorapalummut, Aappilattumut, Kangersuatsiamut, Kullorsuarmut, Innaarsunnut, Naajaanut, Nuussuarmut, Tasiusamut, Nutaarmiunut aamma Upernavik Kujallermut atuuppoq.

Imarisai pingaarnerit

§ 2. Qaanaami kiisalu nunaqarfinni Qeqertani, Savissivimmi aamma Siorapalummi imigassanik 15 procentitut, taannaluunniit sinnerlugu, kimittutigisumik aalakoornartortalinnik nioqquteqartarneq sassallertarnerlu inerteqqutaapput.

§ 3. Nunaqarfinni Aappilattumi, Kangersuatsiami, Kullorsuarmi, Innaarsunni, Naajaani, Nuussuarmi, Tasiusami, Nutaarmiuni aamma Upernavik Kujallermi kingorna nassiunneqartussanik inniminneereernikkut imigassanik kimittuunik kimikitsunillu taamaallaat nioqquteqartoqarsinnaavoq. Nassiussineq Upernavimmiit imaluunniit Kalaallit Nunaanni illoqarfimmit allamiit pissaaq. Imigassat pisiariniakkat pisiniartumut toqqaannartumik imaluunniit nunaqarfimmi pisiniarfik aqqutigalugu tunniunneqassapput.

Imm. 2. Imigassanik siuningaaniit inniminneqanik tunniussineq taamaallaat pisinnaavoq, imigassanik aalakoornartortalinnik nioqquteqartarneq sassallertarnerlu pillugit sukkulluunniit Inatsisartut inatsisaanni atuuttumi nioqquteqarnissamut piffissaliussat aalajangersakkat iluini.

Pineqaatissiissutit

§ 4. §§-inik 2-3-mut unioqqutitsisoqartillugu pineqaatissiisummik akiliitsisoqarsinnaavoq.

Atortuulersinneqarnera

§ 5. Nalunaarut ulloq 4. marts 2011 atortuulersinneqarpoq.

Imm. 2. Peqatigitillugu Qaanaap Kommuniani imigassanik 15% sinnerlugu aalakoornartortalinnik nioqquteqartannginnissaq sassaallertannginnissarlu pillugit Namminersornerullutik Oqartussat nalunaarutaat nr. 11, 20. juni 2007-imeersoq, kiisalu Kommuneqarfik Upernaviup nunaqarfiini imigassanik aalakoornartulinnik nioqquteqarnerup killiliivigineqarnera pillugu Namminersornerullutik Oqartussat nalunaarutaat nr. 7, 21. marts 2002-meersoq, atorunnaarsinneqarput.

Namminersorlutik Oqartussat, ulloq 4. marts 2011

Agathe Fontain

/

Ann Birkekær Kjeldsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut